



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : f Tir Yimyim

ig tir_yimyim



tir yimyim

TAPAK 8

Gaza atema Trump indang 15-point plan Israel-i magizüker: Netanyahu

Chaliha-i Korea Masters nung mezüngbuba BWF World Tour Title benogo



VOL. XXIII ISSUE NO. 298 (ADOK 298) DIMAPUR TENTONÜ (MONDAY) LUROI (AUGUST) 10, 2026

₹ 5.00

FCRA Amendment Bill reprangdaksütsü ayongzüker

Aizawl, August 9, 2026

(Agencies): Mizoram Chief Minister Lalduhoma-i Centre sorkar dang Joint Parliamentary Committee (JPC) ka nem Foreign Contribution (Regulation) Act (FCRA) Amendment Bill reprangdaksütsü ayongzüker.

New Delhi nung Union Home Minister Amit Shah den ajurutepdang state sorkari FCRA Amendment Bill asoshi tebilembatem lemsatep ta CM Lalduhoma-i ashi.

Iba mapang CM Lalduhoma den Mizoram nung arogo telok tongti ana- Mizoram Kohhran Hruaitu Committee (MKHC) aser Council of Churches in Mizoram

(CCM) nungi teshimtet nübotem aden.

Centre sorkari FCRA amendments asüba atema Mizoram nung foreign contributions anguba arogo aser civil society organization aikati tebilemtsü abener.

Congress-ia CM Lalduhoma dang Mizoram Assembly indang special session ka jazüka iba onük jembitsü aser bangzüng ka renemtsü ka ayongzüker.

Külen, Presbyterian Church of India aser Baptist Church of Mizoram dena arogo telok tongti 9 adenba Council of Churches in Mizoram-ia August 11, 2026 nü Aizawl nung lungkak aitba rally ka alitsü ayongzüker.

Kuki-Zo teloktem den SoO agreement sign süshiogo

Imphal, August 9, 2026

(Agencies): Ministry of Home Affairs (MHA), Manipur sorkar aser Kuki-Zo telungpur teloktem tsünga New Delhi nung Suspension of Operations (SoO) agreement tasen ka nung sign sütepogo.

SoO agreement yanglushiba aser meyipa reprangshiba nung Manipur litsü kümzüka ayur aser Constitution of India sasep nung yimtenren olemtep alitsü lateta lir ta ketdangsürtemi ashi.

Iba senden nung Centre aser state sorkartem nungi ketdangsürtem den Kuki-Zo telungpur telok tongti ana- Kuki National Organisation (KNO) aser United People's Front (UPF) nungi teshimtet nübotem aden.

Iba SoO agreement nung sign asüba sülen küm atema revised

ground rules aser terms of the agreement mapa tenzüker.

Iba revised operational norms kübok designated camps tenet tashi mepetmesü aliba tesemtem nungi belentsü aser active camps ajema akümtsü lateta lir.

Maneni, camp consolidation process nung shilem ka ama telungpur züngsemtemi anasatiba Central Reserve Police Force (CRPF) mesüra Border Security Force (BSF) camps nung prangpongtem yutsütsü.

2008 küm KNO aser UPF kübok Kuki-Zo telungpur telok 25 den tripartite SoO agreement mezüng sign sütepa liasü. Iba mapang KNO kübok telok 17 aser UPF kübok 8 liasü aser iba sülen nungi agreement atsülanga arur.

Dimapur nung dokan ka mitsü küma rongdok



Dimapur, August 9, 2026

(TYO): Deobar nikongdang Dimapur nung SBI bazaar branch anasa hardware dokan ka mi agi mitsü küma rongdokogo. Ajisüaka, iba lendong nung nisung yiruba mesüra asüba kecha mali.

Iba temeketnung aliba pan dokan kibur kati mapang shitak nung Vishnu Hardware dokan kibur dang phone ajanga osang sangoktsü. Kitsükkirong lendong atalokba

mapang iba tesem nung power supply maliasü kechiyong Power Department-i Dhoibinala nung aliba transformer shibanger liasü.

Mi agi Rs 40-50 lakhs shi alang osettsüset takoksa bentsür aruogo ta dokan kiburi ashi.

Central aser West Fire station nungi mapang shitak nung fire tenders aruba ajanga mi azüoktet aser tangalen kaoa moudaktsüi ensepteta liasü.

NE region ya sobaliba temeyoktep takartiba tesem rongnung ka lir



Dimapur, August 9, 2026

(TYO): Northeast region nung kin aser oshi balala aliba lisopur tapu 220 shi lir aser iba ajanga alima nung cultural diversity takartiba rongnung iba tesem ya ka lir Nagaland Legislative Assembly, Speaker Sharingain Longkumer-i ashi.

Dimapur nung International Day of the World Indigenous Peoples sentong nung Sharingain-i iba osang lemsatep.

"Kin shia indang oshi, inyaksangshi, sobaliba ozüng, benjungbentsü aser tangatetba balala lir. Iba temeyoktep ya tashimaitba ka masü saka asen tashi tulutiba lir aser India nung temeyoktep senmang indang taküm kuli lir" ta pai ashi.

August 9, 2026 nü Dimapur Town Hall nung "Honoring Indigenous Midwives: Safeguarding Life and Well-being" omen kübok iba sentong Nagaland Indigenous Peoples Forum-i ayonga agiogo aser north eastern state balala nungi teshimtet nisungtem arua aden.

"Iba benjung ya tetushi agütsüba dang masü saka tajaba ka lir. Putu aika lisopur tanur sotsüba tetsürtemi kanga tasü itta, aria bilema aser bendanga agüja arur. Parnoki anibelem arema tenzüka ajanga tetsütem aser kinü tanur aika len ania moatsüogo" ta NLA Speaker Sharingain-i ashi.

"Nagaland nung asen lisopurtem temetentem asoshi Nagaland Legislative Assembly nung Assembly committee ka tentettsü. Northeast nung lisopur kin aika Article aser Schedule balala kübok kümzüka lir" ta paisa shisem.

"Iba ya asen putiotsü, maitüsü aser temeten balaka ajitetba lir aser iba ajanga linük renlokba nung shilem agidang asen sobaliba senmang wazüka ayutsü temeten angutsü. Tanü Vikshit Bharat mesüra developed India by 2047 atema inyaka aodang asen senmang wazüktsü" ta pai metetdaksü.

"Viksit Bharat mesüra developed India by 2047 ya nisung billion ka indang taginüba lir. Union of India nung state ajaki iba mission nung shilem agiba agency ka ama policies aser strategic plans tanen maka renemer" ta Sharingain-isa ashi.

Iba mangdang nung Northeast shilem ka lir aser pei pei state sorkartemi mangdang atongtsü atema mapa tajungtem inyaker aser meranger aser Nagaland-ia shilem agia arudar ta paisa metetdaksü.

"August 9 nü asen midwives nem o agi dang tetushi agütsüba yagi meperir. Asenoki meta talang pilar alidak tetsü shia teyarir mali ama mebilemdaktsütsü atema asen rural healthcare network

pusema nungittsüla" ta MLA & Advisor, Science and Technology, Nagaland Kuzholuzo Nienu-ia ashi.

"Lisopur health practices ya asen taintem den külemi mesamatsü atema zülü nung ayutsüla aser wazüka ayutsüla. Asenoki traditional caregivers aser certified workers tsünga kati ka nungi angazükteptsü, tejen shisatsü aser tanü science tsünga tesentaktep yanglutsü atema meratem agitsüla" ta Kuzholuzo-isa ashi.

Iba nükjidong ya kintem tsünga jara yanglutsü masü saka aputem yanglutsü atema lir. Sobaliba lemsatepba, lanur sensaksemba, academic programs, aser civil society dialogue ajanga human-to-human contact tajungba akümtsü amanger" ta NEIPF, Chairman, Anup Chetia-ia ashi.

Asenok tsünga putepa aliba ajanga lisopur yimtenren, rongsenketzüng, lokti aser sobaliba tarutsü atongtsü ta paisa ashi.

"Asenok asoshi süoki ia bilemtsüba onük kaji ozüng alema nisungtem aruba aser ozüangi memelaba cross-border movement lir. Tangalen nungi nisungtem aruba mazüoktetra asen lisopur asoshi khuret bentsür arutsü aser demographic balance raksatsü" ta NEIPF, Chairman Anup-isa ashi.

Assam sorkari 'flood damage survey' tenzüker

Guwahati, August 9, 2026

(Agencies): Assam kübok district pezü nung tzümetsüng agi teraksa jenti bentsür aruba sülen hopta asem shi süir state sorkari Deobar nungi takoksa anguba asadangtsü atema survey ka tenzüker.

Tzümetsüng lendong balala nung nisung 99 tashi taküm samaogo, ki aika raksatsüogo aser kiset shiruru meyrjang aika tepsetogo.

Assam state sorkari August 30 tashi survey agitsü aser idangji kibongtem ajanga takoksa ajuruba jangiatepa teyari agütsütsü mapa tenzüksü.

"Sibsagar, Charaideo, Jorhat aser Golaghat nung survey agitsü. Item district nung July 19 nü tzümetsüng timtem atalok aser tesem aika tzü agi metsüngbanga lir" ta Revenue and disaster management minister Keshab Mahanta-ia ashi.

"Sorkar ketdangsürtemi timtem ajuruba kibong shia semdangtsü aser nisung taküm samaba aser takoksa ajuruba asadangtsü. Iba maparen tembangba sülen September ita tom ka nungi senotsü teyari agütsü tenzüksü" ta pai ashi.

"Kibong shia nem Rs 1.78

lakhs nungi Rs 3.5 lakhs tema agütsütsü akok" ta Cultural Affairs minister Bimal Borah-i compensation structure indang lemsatep.

"Ki ajunga raksar nem Rs 1.20 lakh agütsütsü, külen ki telung nung osettsüset raksartemia kasa senotsü teyari angutsü" ta pai ashi.

"Nashi shia Rs. 37,500, handlooms raksaba shia Rs. 5,000, napong, san mesüra ak shia Rs. 4,000 agütsütsü aser iba ya kibong shia nem teimba agi kiset shiruru 30 atema senotsü teyari agütsütsü" ta Borah-isa ashi.

Advisor TN Mannen-i Khanimu nung Panchayat Hall semzüksü



Advisor, Law & Justice and Land Revenue, Government of Nagaland, TN Mannen-i August 8, 2026 nü Khanimu nung Panchayat Hall semzüksüba noksa nung angur.

Dimapur, Luroi/August 09 (TYO): Advisor, Law & Justice and Land Revenue, Government of Nagaland, TN Mannen-i August 8, 2026 nü Khanimu nung aliba nüburtang dang telungjem ajanga tarutsü nung yimchiyimjunga alitsüsa yangertsü ayongzüka liasü.

Khanimu nung Panchayat Hall tasen semzüksüba sentong nung jembidang, Advisor Mannen-i yimdaklir tem dang aroki khuret angateta abentsü aser rongsenketzüng tsütsü maongka bushitsü ayongzü.

Terenlok ya tia agi bener arur masü saka telungjem nung inyakba, temulung rapoka jembishinü akaba, democratic yimya nung telemteba agiba aser lokti tuluba aser kija tebilemba akumtsüboa amshiba ajanga bener arur, ta pai ashi.

"Kodang asenok külemi telemteba agir, itangji külemi tejakleni aor," ta pai ashi.

Advisor-i nüburtang dang lenmang, community hall, tzu sources, kaket reju aser health centres ama sorkari yaria

yangluba ki o jen tem kumzüka ayutsü ayongzüka liasü.

Item rongsen ya ajak meyong aser pei jurila meyong ama nüburtang kasa anepalua amshitsüla, kechiaser senzuka yutsüba mesüra mashi lenmang nung amshiba ajanga yimtsüng nung aliba kibong ajunga akoksar, ta ashi.

Nüburtang dang mürekmejua mapang shidak nung yanglushia aser anepalua amshia arok meyong osetsüset kibur ama amshitsü ayongzü.

Mapang ya rongsen tulutiba lir, aser nüburtang sorkar mapa kisüng ataa mapang meindoktsüla. Lanurtemi skills angazuka enterprises tila nungi tenzüksüla, tanü-asüng aluyimya yimya amshitsüla, shiruru metsüba, local crafts, tourism aser services ajanga tajangzük angutsü, ta ashi.

"Teimla maka aser kanga tataktet aliba sorkar mapa kisüng bushia mekazüi lokti asoshi shilem tajung agir ka-ka akumtsüla," ta pai ashi.

Mokokchung jila aser

kidanger Assam state den lenmang tesendaktep tajung aliba yongb Khanimu renloka aotsü teimla aser nukla lir, ta Advisor-isa ashi.

Item sempet aser nukla asangsnag akumtsü atema nüburtang lanur shisatsü agizüksüla, ali dak sendakba ozüng tem atsushitsüla aser sector balala nungi terenlok asoshi senotsü indoktsü jangratsüla litettsüla, ta ashi.

Paisa terenlok atema ochishia aser tangari tamang katettsüsa alitsü aser meranga inyaksü ayongzüka liasü.

Iba sentong nung Chairman, Khanimu Village Council, Tongpang Aier-i pela agizükba o jembia. Chairman, Longjang Medemsanger Putu Menden, N Temjen Aier aser Yapangla, Project Director, DRDA Mokokchung nungeria o tatsütsü jembia liasü.

Lima Imchen, Choir Master, LBA ajanga ken ka aten aser S Imli Aier, Deacon, KBA ajanga melepzüng o jembia sentong tembang.;

DC Mokokchung ajanga metetdaksür

Dimapur, Luroi/August 09 (TYO): Deputy Commissioner Mokokchung, Ajit Kumar Verma, IAS ajanga sangdong ka nung ward councillors, Ungma village, Mokokchung village, Chuchuyinpang village aser Khensa village nungi putu menden züngsemtem aser GB's union, ward ketdangsürtem aser

Mokokchung jila nung aliba nüburtang dang taküm Indian Independence Day ya August 15, 2026 anepdang 8:40 ako nungi tenzüka Imkongmeren Sports Complex, Mokokchung amungtsü, ta metetdaksü.

Paisa lokti tentet balala aser nüburtang dang iba sentong nung arua adentsü ayongzü.



Tanü August 9, 2026 Aoyimsen Baptist Arogo nung Mr. R. Imti Imsong, Pastor-i züluba kaket 'Remshilu', Mrs. Imtijungla Longchar shiba nüngtugu sayutsüngir aser kaket zülur ka lir, la ajanga sayatsüba noksa nung angur. Sannüker tasoba küm 50 ajungba nüngtem nung sermon 50 züluba kaket ka lir. Tang agi tezüluri züluba kaket tasembuba lir.

NITI (NEET-JEE) Academy-i scholarship shilem 50 agütsütsü

Dimapur, Luroi/August 09 (TYO): Nagaland nung medical aser engineering züngner asoshi coaching institute tajung rongnung ka ta züngshia aliba NITI (NEET-JEE) Academy ajanga NEET nung jenjang tajung angutsü tejangraba alir nem maongka agütsür.

NITI Academy ajanga Hombarnü One-Year NEET Rankers Batch tenzüksü aser iba batch nung enroll asür kaketshir shia nem scholarship shilem 50 den Batch tenzüksü anogo anepdang 9:00 ako nungi tenzüka tejangrar kaketshir atema Free Demo Calss agütsütsü.

Nagaland tesem balala nungi kaketshir tem jenjang talangba nung NEET asoshi tajungtiba nung renemtsü asoshi iba maongka ya agütsür. One-Year NEET Rankers Batch kübok kaketshirtem medical

entrance examinations asoshi renemshiba nung yimya balala amshia angatetdakja renemdaksütsü.

Iba sentong nungya IIT backgrounds nungi tesayurtem alitsü teti academic guidance, anogoshi practice papers, study materials, academic seminars, doubt-clearing and mentoring support amala agütsütsü.

Kaketshir noklang aika NITI Academy nung tezüngdak lir, anungji state nung competitive examinations asoshi jenjang talang aser tajungba nung renemshitsü asoshi maongka aginür tali akumba sayur.

State nung coaching tsütsü NITI Academy ya mezüngpur ama lir aser school-integrated programme (SIP) amshiba reju state nung mezüngbuba alitsü, koba medical aser engineering züngnertem ajangzüksüsa renemer sayur.

Angami aser Assemese oshi nung 'Fallen Rise' feature film saya



Dimapur, Luroi/August 09 (TYO): Hillock Films ajanga Golden Singnature den lungjemer Angami aser Assamese oshi nung yangluba 'Fallen Rise' feature film August 8, 2026 nü Hotel Vivor, Kohima nung mezüng sayua liasü.

Advisor, School Education, Dr. Kekhrielhoulie Yhome-i iba film sayatsüba mapang Assam nung amenoka aliba film industry Hillock Films aser Nagaland nung aliba Golden Signature lungjemer oshi ana aliba feature film yanglua sayaba atema tenüngsang agüja liasü.

Film nüngja 'Fallen Rise' ya ojang balala lir aser iba ya ajanga Naga nung lokti nung tera yanga aliba sayur aser asen sobaliba tejen aser tekolak

bushiba lokti nungi Khristan yimsü aser shisaliok ajanga 'modernity' dangi melenba indang ashir, ta Advisor Yhome-i ashi.

Anungji iba premiere ajanga international aser national film tetoktepa nung tetsüng ajemoktsü imlar, ta pai ashi.

'Fallen Rise' bilingual feature film indang director Joon Khound-i iba film yangludang ajangshiba tem lemsatepdang, International Film Festival atema full-length movies yanglutsü tenzü, saka item projects nung senotsü jenti nüngdaker, anungji tatem nung mangdang tajung akaba kaketshir tem yimti balala nung shisaluyim bushia jajaba otsü nung ajemdaker yanglutsü mulungtet, ta ashi.

Pai oshi ana aliba film ya Nagaland aser Assam nung tangok ta ashi aser movie tangokba mapang tetsükdaksü balala ajuruba ajanga iba film sayatsü mapang kanga agi ta ashi.

Cast Director, Zapusazo Sirie ajanga jembidang iba movie ya October 2022 nungi tangok tenzk aser movie tangoka yimtsüng aser yimti balala nung jajadang takum yimya, sobaliba, yimsü, tamangba yimsü balala tajangshiba tajung liasü ta ashi.

Paisa iba film tangoktsü melaba aser movie nung shilem agiba atema Mezoma village council aser yangji aliba nüburtang dang pelaba lemsatepa liasü.



Kohima Lotha Hoho-i ayongzüka August 8 nü LIZU Restaurant aser Event Space Secretariat Road nung Joint Coordination senden ka menogo. Senden nung Lotha Officers Association, Dimapur Lotha Hoho, Chumukedima Lotha Hoho aser Lotha Lower Range Public Organization nungi lenirtemi shilem agia liasü.



Jammu, August 09, 2026: Independence Day jakdang Jammu nung Jammu & Kashmir BJP Tir, Sat Sharma den party nung lenirtemi 'Tiranga Yatra' nung shilem agiba noksa nung angur.

Opposition party temi FCRA bill anema nokdaksü: KC Venugopal

New Delhi, Luroi/August 09 (Agencies): Amongnü AICC general secretary KC Venugopal-i, Centre sorkari Parliament nung FCRA Bill benokra Congress aser opposition party temi iba bill anema sashisashia nokdaksü, ta metetdaksü.

Paisa Union Home Minister Amit Shah dang NEET Paper leak asüba anema longkak aitdang police-i kaketshirtem dak tashiyim amshiba atema telangzüba agüjang, ta metetdaksü.

Osangbenertem den jembidang Alappuzha nungi MP

Venugopal-i, Ato kilonser Narendra Modi aser Home Minister Amit Shah nati tasüngdangbatem paidoker aser Parliament-i arutsü tsübur, ta ashi.

"Taruba anogo ana-ase m tsünga Foreign Contribution (Regulation) Amendment Bill benoktettsü ta Centre-i bilema lira, iba tebilembaji pamok atema dang asütsüla," ta pai ashi.

Venugopal-i, iba bill ya minorities aser melungtet teloktem anema lir, anungji iba bill agizüchtsü atema opposition-i temelaba magütsütsü, ta ashi.

India nung longkak aiter

kaketshirtemi, longkak aitba nokdangtsü atema injang amshitsü, ajok amshitsü aser tear gas amshitsü atema shibai police nem temelaba agütsü ta asüngdang, ajisüaka Amit Shah-i telangzüba magütsür, ta pai ashi.

"Nüburtem anemba bill ya benoktsü atema Amit Shah aruyonga Parliament nung opposition-i sashia ibaji anema longkak aittsü. Iba bill ya linük temzüng alema aser nüburtem anema lir. Iba ama bill ya agizüchtsü atema onoki temelaba magütsütsü," ta Venugopal-isa metetdaksü.

Jharkhand nung JPSC züngsem ase mi menden nungi anenogo

Ranchi, August 09 (Agencies): Jharkhand state sorkari tuyuba nung ajemdaker Jharkhand Public Service Commission (JPSC) nung züngsem ase mi menden nungi anenba shidi agütsü aser state Angh, Santosh Kumar Gangwar-i menden nungi anenbaji agizükogo, ta Amongnü Lok Bhavan-i sangdong ka ajanga metetdaksü.

JPSC züngsemtem- Ajita Bhattacharya, Anima Hansda aser Jamal Ahmed nungeri menden nungi anenba shidi agütsüba Angh-i agizükogo, ta sangdong nung shia lir.

JPSC aser Jharkhand Staff Selection Commission (JSSC) Reform Manch-i public service examinations nung ochimashi anema tesüiba hopta ana dak tali longkak aita arudar.

Amongnüa state yimtiba, Ranchi nung Jharkhand sorkar aser JPSC-JSSC nungi

teshimtet telok ka na tsünga senden menogo.

JPSC-JSSC Reform Manch nungi züngsem 8-i state minister tem- Dipika Pandey Singh, Sudivya Kumar, Chamra Linda aser Sanjay Yadav nunger ajurua senden amen.

Anepdang state Angh, Gangwar-i longkak aiter kaketshirtem dang iba onük ya ken o jembiba ajanga dang bentettsü mepishia liasü.

Gangwar-i, "Onoki chirnurtem tarutsü tia den masayaner. Ken o jembiba ajanga dang iba onük bentettsüla. Chief Minister-i iba onük atema tebilemstü akar aser tanurtem tebilemstü onük bentettsü atema maneni onok den jembia arudar," ta metetdaksü.

Paisa, kaketshirtemi pa mesüra Chief Minister ajurua jembitsü akok, ta ashi.

Ano külen Chief Minister

Hemant Soren-ia longkak aiter kaketshirtem dang, teladak süa ochi obendang agütsütsü aser aibelenertem nem temerenshi tulu agütsütsü, ta nangzükogo.

Chief Minister-i, "Lanurtemi pei temeden atema longkak aiter. Sorkari tim tienyachtsü inyakba ajanga lanurtemi tasü itta longkak aita tim takhangba agütsür, kechiyong aibelenbaji onoki jungkai adoktsüogo. Lanurtemi ochi temeden angutsü aser aibelenertem nem temerenshi tulu agütsütsü," ta metetdaksü.

Soren-isa, iba onük ya yimtenren tsütsülen nungi merangloktsüla, kechiyong kaketshirtemi ochi temeden atema yimtenren teyari menügdaker, ta metetdaksü.

July 5 nü 14th JPSC Civil Services Preliminary Examination osang sangdongba sülen nungi kaketshirtemi iba tatidang anema longkak aita arudar.

Air India tayimtsü pilot ana dak mozü tetendangba agiogo

New Delhi, August 09 (Agencies): August 04, 2026 nü Phuket nungi Delhi tashi aoba Air India tayimtsü nung lendong ataloka liasü, aser iba dak sendakba nung pilot ana dak psychoactive substance (dope) screening test agiogo.

Pilot-in-command screening test report ji 'negative masü' ta putetogo, ajisüaka maneni jangjashitsü atema test agitsü, ta Amongnü aviation ministry-i metetdaksü.

Aviation ministry-i, iba tatalokba ya süoki ia agitsüsa lir, anungji Aircraft Accident Investigation Bureau (AAIB)-i iba tatalokba bushisüngdangtsü, ta metetdaksü.

"Bushisüngdangba osang aser screening test osang nung ajemdaker ano maneni tim teinyachtsü inyachtsü," ta sorkari metetdaksü.

Directorate General of Civil Aviation (DGCA) temzüng kübok yamai lateta lir, "Screening test ji non-negative süra report tejanga mangu tashi 'employee' nem duty melemzüktsütsü. Test agibaji positive süra 'employee' ji de-addiction atema tuyutsü."

Amongnü aviation ministry-i, "August 4 nü Phuket nungi Delhi tashi aoba Air India A320 (VT-EXO) tayimtsü AI 2379 ji ajungbena anünglen nungi süklep 300 alua liasü, iba sülen

tayimtsüji azüokteta Delhi nung junga anenteta liasü. Anüng nungi süklep 300 aluba mapang nung passenger aser cabin crew kar kar yirua liasü," ta metetdaksü.

"Iba tayimtsü nungji kinü tanur asem densema passenger 137 liasü, pilot ana aser cabin crew trok liasü" ta parnokisa metetdaksü.

"Standard operating procedures (SOP) kübok pilot anaprongla dak psychoactive substance screening test agiogo. Pilot-in-command (PIC) dak screening test agibaji ano tali jangjashitsü atema test asütsü nüngdaker. Anungji tali jangjashitsü atema samples ji laboratory dangi yokba sülen osangji atadar," ta parnokisa metetdaksü.

Odisha anasa anünglen 'turbulence' ajanga tayimtsüji ajungbena süklep 300 tsüka liasü. Delhi atongba sülen passenger 13 aser crew member pezü hospital-i anir ao.

Pilot tem dak psychoactive substances test asüba positive süra de-addiction aser rehabilitation atema yoktsü; parnok dak tanaben positive putetra licence ji küm asem atema thinentstütsü. Küm asem abensaba sülen kasa nisungba dak tasembenbuba positive putetra taküm piyong atema licence thinentstütsü.



August 09, 2026 nü Ahmedabad nung Gujarat Asha - Health workers Union (GAHWU) aser Centre of India trade Unions (CITU) züngsemtemi takhangba balala agüja longkak aitba noksa nung angur.

Maharashtra kübok Baramati airstrip nung trainer aircraft ka tsükok

New Delhi, August 09 (Agencies): Amongnü Maharashtra kübok Pune district nung Baramati airstrip nung trainer aircraft ka training agiba mapang tsükok, ta police-i metetdaksü.

Iba tayimtsü ya private aviation academy ka indang lir.

Nikongdang 12:30 ako meta atalokba lendong nung shinga masü.

Amongnü Carver Aviation indang VT-SEX tayimtsü nungji pilot ka aser cadet ka liasü; training agiba mapang nung Baramati airfield nung tayimtsüji tsükok.

Exercise agiba mapang nung tayimtsüji anendaktsütsü mekoki tsükok. Tayimtsü anentsü lazükja aliba tesem nungji manenteti tayimtsüji süklep 20 tali oa airong ka nung tsükok, ta parnoki metetdaksü.

Taküm May 13 nüa trainer aircraft ka nung technical timtem adoka Baramati airstrip

anasa tsükok saka nisung shinga masü.

Taküm January 28 nüa Maharashtra Deputy Chief Minister Ajit Pawar den tangar pezü mena aliba charter tayimtsü ka Baramati airstrip anasa tsükokba lendong nung parnok ajak asü.

Iba lendong nungji Ajit Pawar den pa body guard Vidhip Jadhav aser flight attendant Pinky Mali na, pilot Captain Sumit Kapoor aser co-pilot, Captain Shambhavi Pathak nunger liasü.

Iba mapang nungji VSR Aviation director V K Singh-i, "Pilot-i tayimtsü anendak tesemji junga mangu asütsüa akok, iba sülen pai tanaben anentsü merangdang asütsüa akok," ta metetdakja liasü.

Flight-tracking data ajanga bushitetba agi, tayimtsü metsükok tsünga tayimtsüji anünglen minute 35 shi yimsüa liasü.



August 09, 2026 nü Ranchi nung Minister of State for Defence, Sanjay Seth aser Jharkhand BJP Tir, Aditya Sahu nati Jharkhand recruitment exam nung ochimashi anema lumia longkak aiterem ajurudang tangokba noksa nung angur. State nung kaketshirtemi longkak ait tenzükba sülen anogo 16 jungogo.



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 10, 2026

Yimkümer anogo

Yashi Luroi (August) 9 anogo ya 1994 küm United Nations sabang ajanga lateta toktsüba International Day of the World's Indigenous Peoples anogo liasü. Iba anogomung tenüng ya Ao oshi nung meyipzük nungbo, Alima nung Yimkümer Anogomung ta meyipzük nung tajungba angatetla ta bilemer. Aji oda, English nung Indigenous ta asüba tetezü ya lisor, lipuyimpur mesüra yimkümer ta meyipa amshi nungang asenoki tajungba angatetsü südi ta bilemer. Aji oda, tanü alima tesem ajaklen nisungtem yim kümteta lia aoba yimtsüng aser yimtitem ajak nung kar mezünpur aser kar tesü arurtem ta alitsü, aji alima nung nisungtem libalirua aoba yimya lir. Iba jagi tamasabo nisung ishika dang lia aliba to tesülenbo nisung aika küma yimti tulu akümer. Iba amaji lia lia, mapang süitema aodang, tesem ajaklen yimkümertem dang nungibo tesü arur teimba akümer. Idangji, teimbai mulungba nung yimten aser lokti lateta aoba limatem asünungji, lisopurtem lipok otsü, sobaliba aser lokti nung temeten ajak tesü arurtemi amokbanga adoker. Iba amaji tanü putu nung tashitemetet lima America lima nungi tenzüka asenok ama ano tashitemtet nung tenük junga mesaktetba lima aser yimtsüngtem tashi nung yimkümertem dang nungi tesülen arurtemang nütsünga teimba aser rongsen nunga takarba aser tashitemetet nunga parnoksa tejakleni taoba oa angur. Iba ama tia kaji reprangteta, tesem ajak nung ali kibur, lipuyimpurtem mezüngmeshii mesüi tama-tesü arur ajak liromedema kati ka akhümtsübutepa alitsü asoshi alikintem sabang United Nations ajanga alima nung yimkümertem temeten jembia parnok temeten, sobaliba aser oshi dena kümzüka ayutsü nukjidong nung, alima Yimkümertem mung ya amunger. Aji oda, alima tesem balala nung lisopur tebilemtsütem aser nüngdak rerpangteta jembitsü asoshi küm shia Alima Yimkümer mung anogomung asoshi omen kaka shimteta amunger. Taküm iba anogomung asoshi shimteta omenji "Honoring Indigenous midwives: safeguarding life and well-being" ta shimteta lir. Tetezüji, Lisopurtem rongnung Nubentsür mapa reprangteta akhüm agütsüba anogo aser kümji taküm Luroi 09, 2026 ya lir. Atangji, asenoki mereprangteter dang ashi, akhi mapang asenok alidak tanü ama mozü ki lapoka maka dang aser doctor aser nurse-tem maliba pututem nung yimtak nubentsürtemi dang anepalua tanur asoba mapatemji tanur asodang yariba mapa dang nungibo taoba liasü, kechiyong iba jagi nisung taküm kümzüker aser mulung anisüngzüka tanela nunga tesünep agütsü. Aji oda, parnokji tanü ama Nursing college nung mazüng saka Tsüngremi sayuba shisatsü aser inyakyim tsüraburtem nungi belenzüka senmang ama amanga angazüka aser benshia aruba temeim mapa tajung inyakerter lir. Iba temeim sobaliba tajungji mesamadaktsü tanüa parnoki inyaker. Atangji, tanü medical science ajanga numong dang aser temang shilumanemba ajak nung yarir saka tanüa nubentsürtem temeim teka nungi anguba teyariji kangasa nüngdaker. Iba jagi tesem aika nung tetsü aser tanur na prongla taküm kümzüker aser tetsü mang nung zübo keta tanur watettsü melen, akok tashi nubetsürtemibo tetsü mang nung zübo meketdaktsü meranger. Tanü parnok mapaji bilemdang dang, atangji UNi nüngdaka reprangtetba ama, asenokia aser yimtenia nubentsürtem temeim mapa tajung reprangteta parnok taküm aser kibong asoshi langka tajung inyaktsütsüba kanga nüngdaker. Nubentsüba mapaji tanur asoba nung yariba mapa ka dangbo masü, ibai alima ajaklen lisopurtem sobaliba lir. Iba mapa nungji temang anepaluba aser taküm meshiteta aliba sobaliba mapatem keta lir. Atangji, tanü nübortem alidak yimkümer aser lisopurtem dang nungibo tesü arurtemang tashitemetetba, takarba aser teimba alitsüa akok saka parnoki yimkümer aser lisopurtemji yim tsüngrem ama bilema meima aser akhümtsüba amshira, alima nung yimjung aser tangatettepji yang nung jagi tenzüksü, kechiyong asen sobaliba tajung ajak ya lisopurtemi tenzüka sobaliba lir, asenokbo senmang amangertem dang lir.

OLEMSABANG

POLITICAL PARTY-TEM SEPLASEPSHIBA ANGUDANG SUNGMANGER....!!!

~ L. Kika Pongener

(Yashi adok nungi...)

Ano taoba ita Tir Yimyim osangkaket; Chiteni (July) 22nd anogo nung; Mokokchung District nung Congress Party nung telemsa adokba osang ka ngur nubur aika aoksaogo....!!! Asen Aor shin o ka....."Madong alinung leptok ama"....ta jembir. Party nung lennirtemi anir züngsem ajak tebong ka küma longjemmer-a tangar makok....Election anaben-asemben tashi nung MLA kata matoktet aruogo. Anungji tali longjemshir aser zünyangshir nokdaktsü melen; telemsa-ang lemsa-ra kodaser tangar akoktsü....??? Tesasatsü-ka....Asen Naga lima nung Congress Party meshi-meshia mali ama; ola mali küma-adokba yagi; asen Naga nung takoksa kanga angur. Sorkar nung 'Opposition Bench' makaba ya nubur asoshi takoksa kanga tulu lir. Ashiko, Congress Party MLA kar danga adoka ali asübo....Parnokji Oposition Bench nung mener sorkar aibelendang ola adoker karbo lila....ta nuburi kanga nemjema bilemer. Kechiyong tanga tanungba Political Party-tem ajunga aser Elected member-tema ajak Ruling Govt. aser Chief minister-ba küpoki yiadokogo. Aser ano Election nung khen danga Contest masüba RPP Party; aser Politician-tema Ruling Govt. aser Chief Minister-ba küpoki ayiba angudang nuburtem kanga aoksar....!!!

Ano asen Naga lima aser nuburtem atema kanga-sa takoksa kaji....Naga nung Politician-tem teimba ka nukjidongji Election-i ayitsü; Election nung adoker Ruling sorkar nung adentsü; Minister menden atatsüla aser Portfolio tajung atatsüla aser Election sentsüh ajak aotoker takar akümtsü.....Iba nukjidong nungji dang Election-i ayir. Asen Naga nung Politician-tem Election-i ayibaji takar akümtsü nukjidong nung teimba ayir. Aji oda, Ruling sorkar nung dener Minister atar; Portfolio tajung atanungdang terenlok mapa-a inyaktettsü aser nubur-a yaritettsü aji nunga ta mashir. Ajisuaka, Politician ka nukjidongji ibaji dangpo masütsüla....Tajangzük aser maongka penbuba Politician masü; saka pei linuk aser nubur asoshi timtem aremtsü tangatetba alitsüla. Asen Naga nung Politician-temi....Ni ozü lima yanglutsü aser renloktsü atema kü nubur aser rongsen tenla agüja Eletion-i ayitsü....Aser nuburi shimtetra Minister menden nunga menang....MLA danga suang....Opposition nunga menang....Ni ochishia ozü nubur tenzüksü....ta temulungtetba tulu akaba Politician tanu asen lima aser nuburtemi aginur.

Tan ita Lurui (August) 2nd anogo nung; Nagaland Post osangkaket nung; asen Naga lima nung Political Party tasen ka....'Unified Covenant Party' (UCP) tenzüka (Launched) osang züngshia kanga pela-a züngogo. Tang asen Naga nung senso tajung shirnoki asen lima aser nubur asoshi kanga suoki yia bilemer....Parnok ajaki Naga lima nung Political Party tasen ka kanga aginur....Aser sorkar-i nubur temulung masütsüa aibeleni inyakdang; sorkar anema ola adokdaktsünur....Kechiyong tang Ruling sorkar dak aketba jakla kaji....Nuburtemi ola adoka Procession, Public Rally aser Bandh; iba amala ayongzüka mayimten tashi....Nuburi maginuba mapatem odang inyaker aser nuburtemi ola adoknungdang melenshiba aiben ataloka ajurua aruogo. Kanga tesasatsü-ka, tang ya asen lima nung sorkar tsüngsu apur aser sorkar-i aibelendang ola adoker Party ka danga mali kümogo. Party ajunga Ruling Govt. aser Chief minister-ba küpoki yiadokogo. Anungji tang nungipo UCP Party yagi sorkar tsüngsu pua anidaktsü aser sorkar-i aibelendang ola kabo adoktsü.....ta nuburtemi kanga yimla-a ata-a lidi. Aji oda, UCP Party-jibo tang tangpo Ruling Govt. aser Chief Minister-ba yangkü jagi maitsü sudi ta nuburtemi kanga yimla-a atar.

Jokorla, tang ya Ruling sorkar aser Chief Minister-ba atema kecha tetsükdaktsü mali....Pai koma anitsü mulunger iba amaji anitsü....Kechiba sura Opposition Party mali....Party ajunga Ruling sorkar aser Chief Minister-ba yangkü nung sepadokogo. Ariana, Congress Party dang anunga alinung; Congress Party nunga telemsa adokogo. Ashiko, Congress Member-temjia karbo mapang tatsüka tsüngda nung NPF o BJP den adenba osang angashitsü kecha meteta mali. Asen Naga nung Political Party aser Politician teimba ka nukjidongji kidangi shilangtsü....Tetezü, Ruling Govt. dak oa zükloktsü....ibaji dang. Tang ya asen lennir Chief Minister-ba tekong talangka songteter; teni talangka atsülanger numatangdanga "Kya Hai"....ta asüküma alitsü ama nukla nung angur....Kechiyong pa den madenba Party kata mali....!!! Ajisuaka, ano kanga junga bilemdangra; Chief Minister-ba atema-a....Tang kidangi shilanger Party aser Politician ajak nemji Minister/Advisor menden matatsü-yongjia; mapang shia chitem-aontem temtsüdang pa-a terabo tim-atemtsü sudi....Aser ano kodang Election arudir kidangi shilanger ajak nemji NPF Party ticket ata-a magütsütettsüji....Idangji tokolak terabo menutsü sudi. Ajiser, NPF ticket matar ajakji BJP dak oa zükloktsü akok....BJP-jibo Center sorkar maongka nung sen kettsü yur; tarur ajak pela-a agizüktsü yongya-a atadagi. Atangji, Naga nung Political Party aser Politician-tem seplasepshiba angudang nuburtem aoksar....!!!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US nung Billy Graham retreat nung adentsü aoer pastor ana apu



Assistant pastors- Cinthia Sarai Cardona Otero aser la kinüngbu Nepthali Zozaya Saucedo nati osangbener den jembidang tangokba noksa nung angur.

August 09, 2026: Texas nung alir apuani pastor ana Billy Graham Evangelistic Association (BGEA) retreat nung adentsü atema North Carolina-i aoba mapang nung federal immigration officers-i apu.

Assistant pastors- Cinthia Sarai Cardona Otero aser la kinüngbu Nepthali Zozaya Saucedo nati tena US nung alitsü atema temelaba lir ta ashi, ajisüaka July 23-24 anogotem nung U.S. Immigration and Customs Enforcement (ICE)-i tenaprongla apu, ta Department of Homeland Security-i metetdaksü.

Apuani pastor ana ya Texas kübok Edinburgh nung aliba Comunidad Cristiana Emanuel Arogo nung inyaker. Iba Arogo ya Assemblies of God Arogo lir.

Department of Homeland Security otongdar kati, Mexico sensotem indang visa ji 2022 küm tashi dang lir, ajisüaka parnoki ozüing alema mapang talangka yangi alir, ta metetdaksü.

Ajisüaka Latino Christian National Network board nung züngsem, Merelda Bazan Gonzalez-ibo, "Pastor Nepthali aser pastor Cinthia na ket nung 'religious workers visa' lir aser yangi teti alitsü atema temepishiba agütsüba sülen telangzüba atar," ta metetdaksü.

Gonzalez-isa, "Tenaprong indang religious visa temepishiba agizükogo aser yangi teti alitsü temepishiba agüja lir. Tenaprong ket nung mapa inyaksü temelaba lir," ta ashi.

Osangbenertem senden ka nung Pastor Cardona-i, "Kinüngbu künapronglai airport nung kuli kakettem sayua liasü. Iba linük tonga aruba mapang nungi künaprongla nükjidongji Tsüngrem akhümtsübutsu aser Pa ozüngtem benshitsü atema lir," ta ashi.

Tena tepuokdak anogo ananü ayuba sülen Texas Congressman, Henry Cuellar-i tiyongtsüi ia inyakba ajanga July 25 nü tenaprongla chiokogo.

Cardona-i, anepongi 2:00 ako

meta asüngdangbyaba mapang nung la Khristan asüba ajanga ketdangsertemi la atala-a liasü, ta metetdaksü.

Lai, "Ni mezüing agent ka ajuruba mapang nung ni melung anisüngzüka liasü, kechiyong parnoki Laishiba tetshia liasü, ajisüaka iba sülenjibo parnoki ni atala tenzüka liasü," ta ashi.

Pastor ana apubaji aija Texas Congressman, Henry Cuellar-i, immigration ketdangsertemi yimsü lenirtem masü saka ozüing alema aibelen tulu inyaker tetsütitem aputsü atema dang nendaka inyaksüla, ta ashi.

Apuani pastor ana apuba sülen Border Perspective, Conexión Pastoral, Connected Americans Initiative aser National Hispanic Christian Leadership Conference densema Khristan telok aikati tena pusema liasü.

Taküm June ita nunga Texas kübok McAllen nung ICE ketdangsertemi Nigerian tsür nun Sister Leticia Ugboaja pua liasü, ajisüaka mapang tatsüka tsüingda la chiok.

La chiokba sülen Bishop Daniel E. Flores-i, "Sister Letty ya ozü Arogo nung mapa tajung inyaker ka aser teimla agütsür ka. La chiokba atema ni kanga pelar," ta metetdaksü.

Flores-isa, "Sister Letty apuba dak sendakba tatalokbatemji shisadangra shisabulutsüsa lir. Tangbo Homeland Security enforcement inyakyim kübok nun ka mesüra nisung mashie ka Amongnü anepdang tekülem kidangi aoba mapang nung aputsü aser teka alentsü melar. Iba ya mamangteter aser iba inyakyim ya yanglushitsü nüngdak," ta metetdaksü.

Khristan lenirtemi Home minister ajurua FCRA atema jemb

August 09, 2026: August 06, 2026 nü Arogo nung lenirtemi Union Home Minister, Amit Shah ajurua pa dang foreign funding ozüing yanglushiba ajanga Arogotemi aser Khristan melungtet teloktemi charity mapa inyakba tsütsü tenokdangba aika ajangshitsüa akok, ta shiogo.

Catholic Arogo densema Khristan denomination balala nungi lenir 17-i Parliament building nung Home Affairs Minister Amit Shah ajurua pa dang Foreign Contribution (Regulation) Amendment Bill, 2026 nung temelenshi kar benoktsü mepishi.

Iba bill ya August 13 nü Parliament nung benoktsü tebilemba lir.

August 7 nü osangbener den jembidang National Council of Churches in India (NCCI) nung general secretary, Rev. Asir Ebenezer-i, "Onoki minister (Amit Shah) dang iba bill aritepa mebenoktsü saka stakeholders ajak den jembishinüa iba bill yanglushiba sülen ang benoktsüla ta

mepishiogo," ta metetdaksü.

Arogo nung lenirtemi sorkar dang, bendang linüktemi senotsü agi yariba melungtet teloktem registration anentsüra, thinentsüra mesüra renew mesüra item ama melungtet teloktem indang kiojenji sorkari agiadoktsü atema temelaba agütsübaji agientsüla, ta mepishi.

Taküm March ita nung Ato kilonser Narendra Modi-i aniba cabinet-i amendments bill ji agizüka liasü. Charity dak sendakba melungtet teloktem inyaksangshi teladak asütsü atema iba ozüing yanglushir, ta sorkari metetdaksü.

Iba bill ya agizüka ozüing kümra bendanglen nungi sen angutsü aser amshitsü atema mapang telatet agütsütsü, linük tesem ajaklen registration telatet ka dang agütsütsü, melungtet teloktemi sorkar den social media aser public communications lemsateptsüsa akümtsü.

Khristan lenirtemi, item ama ozüing ajanga Arogotem aser Khristan melungtet teloktemi

ANOGO ABEN TSÜNGREM DEN

Tangartem den lemsatepba

Saka koba nisung alima oset aka, aser pei adianu tenüngdaksü ngur, pa nungi pei aria bilemba sota yura Tsüngrem temeim koda Pa dak alir. 1. Yohan 3:17

Tsüngremi mulungsoa asenok den pa akaba tajungtiba lemsatepbaji: pa lima, par jabaso, aser pa Kotakji lir. Pai asenok nem taküm agütsü aser ibaji amshi asenok kechi nüngdaker agütsü, tashi aser asa-meyang mapa aser anogoshia asen nüngdaktem, sempet (talent) aser tangatettsü tashi, alongtetta inyaksü tashi taküm tajungba alitsü leman bushitettsü tangatetba, shisa kaa alitsü tangazükba, temetetba nung aintsü leman bushitettsü shisatsü, timtem mapang nung aremzüksü tasü tait tesüngjem taküm alitsü aser tesünep nung asütsü tamang agütsü.

Tsüngremi ajak nem sempet balala agütsütsü mulunger. Yamaji inyak dang pai kija atema masü, telok atema bilemer. Shirnok nem telatet sempet agüja lir parnokia tangar den lemsateptsü pai mulunger. Pai iba mapang tajungji parnok nem agütsür.

Nüngtuku scientist kati tang nisungi pa tangar den amalitepa alitsü yanglu ta bushitetogo ta ashi. Ibaji mapangji lir! Tsüngremi putu aika shia aruogo, "Kati ka dang meimang aser kati ka den lemsatepang."

O Tsüngrem, nüngdakba pur den lemsateptsü mapang aiben onoki makar aser tekuro akümer. Onok akaba tangar den lemsateptsü onok nem mulungso temulungjang agüjang. Amen

sensakertem tenzüka tsütsü tetsükdaksü kanga ajurutsü ta bilemer.

"Khrista lenirtemisa tang renema aliba bill ya ajanga Arogoi temeim mapa inyakba missions kongshitsü ta minister dang shiogo," ta Ebenezer-i metetdaksü.

Ano külen taoba mapang United Nations nung inyaksang aser Lok Sabha MP, Shashi Tharoor-ia, iba bill ya teladak asütsü atema masü saka sorkari melungtet teloktem azüoktsü nükjidong nung benoker ama reprangteter, ta metetdaksüogo.

Paisa opposition party tem dang, iba bill ya jungjunga asadangtsü atema Parliamentary select committee ka nem agütsütsü asoshi party temi longjemer takhangba agütsütsüla, ta metetdaksüogo.

Ocet ka ajanga Tharoor-i, "India nung Arogo aser Arogo dak sendakba charity organization aikati nisung million aika taküm ajungkettsüogo, shisaliok

agütsüogo aser aneptsüogo. Terenlok tsütsü partner ama inyakertem dak melung melemtetbaji ajanga democracy jenjang ilatsür," ta metetdaksü.

Ano külen August 4, 2026 nü U.S. Congressman Riley Moore-ia social media ajanga, iba bill ajanga sorkari yimsü dak sendakba charities azüoktsü; iba ya Khristantem anema inyakba lir, ta aitsüogo.

Moore-isa, tang renema aliba bill ya agizükra ibaji ajanga India aser US na tsüingda tesendaktep-a kongshitsü, ta metetdaksü.

1976 küm agizükba Foreign Contribution (Regulation) Act ya ajanga bendanglen nungi senotsü teyari anguba melungtet teloktem (non-governmental organizations), yimsü dak sendakba teloktem aser charities inyakyim latettsür.

Iba ozüing kübok bendanglen nungi senotsü agizüktsü atema organizations ket nung license number alitsüla, koba dang 'FCRA number' ta ajar.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngaren

(n) medemer telok balala, zünga tatongsen (age grouping)

* Ozü yimtak züngaren telok pezü lir.

Züangi

(n) tezü nung atangba süngjang tapu ka (cucumber)

* Aliba nungertemi züangi lu kanga junga ayimer.

OLONG PAITEP # 7593

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonung chiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7592 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

JCB Hydromax streamliner ajanga Southern California Timing Association (SCTA) land speed record yangluogo aser ibaji 368.347 mph tashi otetba lir.

Iba hydrogen-powered gari ya Wing Commander Andy Green-i anir aser Blown Gas Streamliner class (AA/BGS, 500+ cubic inches) nung toktepdang otsü tasen yanglu.

Itanagar nung Yagamso River nungi jana seret 5,200 agitet

Itanagar, August 9, 2026
(Agencies): Itanagar nung Yagamso River nung volunteers-i clean-up drive ka agidang jana seret 5,220 shi agiteta endokogo.

Iba clean-up drive ya Youth Mission for Clean River (YMCR) aser Abalaw

Memorial Multipurpose Society külemi yaritepa ayongzüker aser Itanagar Smart City Development Corporation Limited-ia nungita yaria liasü.

Honibarnü bendenba jana nung disposable plates aser glasses teimtiba liasü aser

ayong nungi 9,000 pieces shi agitet.

Itanagar Municipal Corporation Ward No.10 corporator Yukar Yaro-i tayongertem aser volunteers nem tenüsang agütsüogo. Paisa nübortem dang jana timi endoktsü ayongzüka liasü.

Tripura nung Eklavya residential schools tasen 6 lapoktsü

Agartala, August 9, 2026
(Agencies): Ministry of Tribal Affairs-i Tripura nung Eklavya Model Residential Schools (EMRS) tasen trok lapoktsü yariba atema Tripura Tribal Welfare Minister Bikash Debbarma-i Union Tribal Affairs Minister Jual Oram dang pelaba shiogo.

Ministry of Tribal Affairs-i school tasen trok lapoktsü

mulunga agizükba ajanga lisopur kaketshirtem asoshi residential education facilities tashi aittsü.

Centre-i yariba ajanga reju trok tiptema inyaksangshia aotsü aser Tripura nung lisopurtem aliba tesemtem nung EMRS network ulushitsü ta Debbarma-i Jual Oram dang ashi.

Oram den ajurutepe senden amenba ya maongka ka lir aser Ministry-i teti Tripura nung tribal

education nungita yariba atema tenüsang agütsür ta Debbarma-i ashi.

Iba senden nung Debbarma den Tripura Tribal Welfare Residential Educational Institutions Society (TTWREIS) executive engineer Tapash Ranjan Bhowmik aser Tripura Housing Board deputy executive officer Madan Gopal Modak na liasü.

KNP nung Special Rhino Protection Force nem tetushi agütsü

Guwahati, August 9, 2026
(Agencies): Kaziranga National Park nung Special Rhino Protection Force (SRPF) nem tetushi agütsüba sentong ka agiogo.

August 8, 2026 nü parnok nem tetushi agütsüba sentong nung Assam Forest Minister Jayanta Mallabaruah, Kaziranga MP Kamakhya

Prasad Tasa aser Keshab Mahanta nunger aden.

2019 küm züngsem 82 akümba SRPF ya Kaziranga nung mapa lezmüksü. Parnok ya KNP nung anti-poaching mechanism akangshitsü atema training kanga junga agia liasü.

Tesüiba nung Kaziranga nung güntok shikariba timtem kanga ajurua liasü aser 2013 o

2014 nung shikaritemi kümshia güntok 27 khaset. Iba khuret ajanga ketdangsürtemi güntok kümzüka ayutsü asoshi specialised & coordinated approach mapa ulushitsü tenzü.

SRPF-i Forest Department, Assam Police aser tanga enforcement agencies den külemi güntok shikariba anema mapa akangakanga inyaka arur.

Manipur nung sepaitemi prangpong-injang aika ngutet

Imphal, August 9, 2026
(Agencies): Manipur nung sepaitemi August 8 nü Khema Reserved Forest nung prangpong-injang aika ngutetogo.

Imphal East district kübok Napet Palli nung sepaitemi 9mm

pistols, magazine, two single-barrel guns, improvised explosive devices (IEDs) aser combat equipment aika ngutetogo.

Parnoki IED seret 4.6 shi ka den grenades 14 aser prangpong balala indang injang

162 live rounds angu.

Parnoki ngutetba oset ajak puogo aser maneni bushisüngdang südar. Prangpong-injangtem ya kong nungi bener aru aser telungpur telok shirnok indang ta asüba putettsü merangdar.

Gaza atema Trump indang 15-point plan Israel-i magizüker: Netanyahu

Tel Aviv, Luroi/August 09 (Agencies): United States Tir Donald Trump indang Board of Peace ajanga Gaza atema sentong yangluba Israel-i magizüker aser Palestine nunger telungpur Hamas telok nok-nü metoktsü tashi Gaza nungi mainshitsü, ta Israel Ato Kilonser Benjamin Netanyahu-i ashi.

"Israel-i 15-point document magizüker," ta Netanyahu-i Deobarnü cabinet senden ka nung ashi, koba taoba ita Hamas-ia mulunga liasü.

"Hamas telok tejangja nok-nü metoktsü tashi Israel army tem mainshitsü aser asen sepai aser asen nübur asoshi timtem agütsüba maneni samatsütsü."

Iba ken o America nunger den jembitar, ta pai ashi.

"Parnok tebilemba kar asenoki agizüktettsü akok aser karbo onoki magizüktettsü, aser item nung asenok koda akang-akanga nokdaksü, aji asenoki meteta lir," ta ato kilonseri ashi.

Tang tashi White House

mesüra Hamas nungi telangzüba kecha mali.

Taoba küm October ita Hamas den ceasefire ka züngzüktepba sülena Israel-i anogoshi amai Gaza Strip tesem ajungalen maka arur.

Trump-i July 30 nü otsüsütsü tezüngzüktep ka sangdongba nung Hamas aser Gaza nung tanga telungpur telok ajunga nok-nü jungjunga yutsütsü shia liasü aser ibai yimjung aser tesunep asoshi tongtipang mera ka alitsü ta ashi.

Ajisüaka taoba hopta US-i aniba Board of Peace director Nickolay Mladenov na senden ka amenba sülen Hamas disarmament renemba sülen ang Gaza nungi Israel sepaitem aishitsü ta ashi.

Deobarnü par cabinet den jembidang, ni ato kilonser inyak tashi Palestine nunger linük kata malitsü aser US-i bhukumba sentong nung Israel manidaksü, ta Netanyahu-i ashi.

Israel-i chichiba

disarmament ashi taila disarmament maginer, aser yangji nok-nü tila tem densema nok-nü ajunga indoktsüba lir, ta pai ashi.

15-point plan yagi mezüngbo Hamas meyong nok-nü tulu, military production sites, nok-nü ayuba tesemtem aser par telok indang longpok tesendaktep nung rangloker.

Hamas aser Israel nati taoba October ita ceasefire agizükba sülen mongin temibo Israel-i iba tezüngzüktep akumtsüboa amshitsü temulung melemi arur, kechiaser par sepaitemi maneni Gaza nung amaker aser nisung tepseter.

Iba ceasefire tenzükba sülen nisung 1,250 tepsetogo aser 4,120 yirugo aser ano ki o jen teraksa nungi nisung tasü mang 800 dak tema ngutetogo, ta Gaza indang health ministry ajanga ashir.

2023 küm October ita nungi tenzüka tang tashinung Gaza nung nisung 73,300 shi süogo aser 174,000 yirua lir.

Houthi teloki Saudi indang refinery ka amak

Sana, Luroi/August 9 (Agencies): Yemen nung Iran den sendaktepa aliba Houthi teloki ashiba agi, parnoki Deobarnü Saudi indang Aramco Jazan refinery makogo.

U.S.-Israel nati Iran amakba ajanga parnok meketa aliba tesem mesüngjemteti aliba mapang Saudi-i Turkey aser Pakistan na den defence tenangzüktepba ka nung sign asüba sülen anogo ana lir iba refinery ya makogo.

Yimjung atema Iran aser United States na ken o tembanga mejembiteti aliba mapang Houthi teloki taoba ita Temerem tzüyim nung Saudi Arabia indang rongtem mesenzüdaksütsü tenokdangba agütsüba sangdongogo. Saudi-i parnok anema jenjang agiba ajanga parnoki iba tenokdangba agütsüogo, ta ashi, koba Riyadh-i magizüki arudar.

Saudi energy ministry-i ashiba agi, refinery nung mi adok, saka mapang tatsüka lir temsepogo. Ketdangsürtemisa lendong nung nisung shinga meyiru aser parnoki iba tatalokba achayangdar, ta ashi.

Houthi teloki iba refinery amaktsü atema drone ka amshia liasü, ta military otongdar Yahya Saree-i X ajanga metetdaksü.

Parnoki taoba mapanga Jazan nung Aramco indang facility ka makogo, kong anogo nung crude oil barrel 400,000 process asür. Parnokisa Temerem tzüyim nung Yanbu makogo.

Maneni parnoki Yemen kübok Temerem tzüyim tzüküm nung aliba Mocha, Saree yimti makogo, ta tanga sangdong ka ajanga metetdaksü. Iba yimti ya alima kin temi agizüker aliba

Aden nung amendaker aliba sorkari aziüoka lir, shirnok nem Riyadh-ia teyari agüja arudar.

Yemen sorkar source asemini Reuters dang ashiba agi, rongnendak oset bendenba tesem aser commercial quay amaktsü atema Houthi puri yokba drone tem air defence temi khadangtsü merangdar.

Saree-i ashiba agi, Houthi teloki iba tesem nung Saudi nunger sepai aser prangbong injang aser hadir balala yua aliba tesem dak rangloker jenjang agidar. Yemen amakba dak sendakba nung Saudi-i kecha telangzüba magütsü.

February 28 nü nungi US aser Israel nati Iran amak tenzükba sülen Iran aser parnok den sendaktepa aliba Shi'ite Muslim telungpur teloktemi Saudi Arabia aser tanga Gulf states tem amakba den tzüyim nung rong senzusenpong mesüdaksütsü atema tenokdangba agüja arudar.

Aramco chief executive Amin Nasser-i taoba hopta ashiba agi, tawa company indang facility tem amakba ajanga production nung tetsükdaksü kar adokogo, saka yakta inyaksangshi tenzüksü ta temulung lema bilemer. Pai ashiba agi, item facility tem amakba ajanga rongsenketzüng dak mekongshi.

Iba minprong ajanga alima ajunga nung global energy supply nung tetsüdaksü adokba den alima rongsenketzüng dak kongshiba sülen Saudi Arabia-i Hokolbarnü Sunni Muslim U.S. allies, Turkey aser Pakistan na den alliance ka yangluogo.

Amokmeren balala nokdangtsü asoshi longjemer nokdaksü asoshi tesendaktep akangshitsü atema iba

tenangzüktepba yangluogo aser linük asem rongnung ka danga makra parnok asemprongla amakba ama züngshitsü, ta tenangzüktepba nung shia lir.

Turkish Foreign Minister Hakan Fidan-i ashiba agi, alliance tasenba ya Iran mesüra tanga linük kar dak rangloker yangluba masü saka linük asem security nongita yariteptsü asoshi lir. Ajisüaka tawa Saudi amakba dak sendakba nung Pakistan aser Turkey nata adentsü madentsü iba indang osang tejangja mali.

Fidan-isa, linük asem ka danga makra koba amala teyari agütsütsü iba indang telemtetba ya allies tem sensak asemba sülen agütsü ta ashi.

July 27 nü Aramco-i Jazan nung parnok indang refinery shibanga ayu, koba Yemen den arrtsü anasa lir. Houthi teloki plant indang Integrated Gasification Combined Cycle (IGCC) complex aser tank farm area amakba sülen iba refinery shibanga liasü, ta IIR sangdong ka ajanga metetdaksü.

Iba refinery nung gasoline aser ultra-light sulfur diesel nata adokdaksür.

US aser Israel nati Iran amakba ajanga rara ya tanga tesemia prokshia oa Middle east ajunga amai tang mepetmesü nung lir, aser Strait of Hormuz lapoktsü atema tenangzüktepba ka meyanglutetba ajanga alima ajunga totzü agi anüngba mapang ka lir.

Saudi asoshi maneni tetsükdaksü adoka Hormuz shibanger aliba mapang ano Temerem tzüyim nunga rong mesenzüdaksütsü atema Houthi puri tenokdangba agütsüba ajanga shishilemba nung tetsüdaksü adokogo.

Tuli Lenten Baptist Arogo-i Pelar



19 July 2026, Tuli Tzü Lendong agi kongshir (affected) alir kibongtem nem Arogotem aser Telok balalai Tuli Lenten Baptist Arogo ajanga teyari agütsüba lemtsütsü mapang tangokba noksa.

Alima yimyai bener arutsüba tzü lendong agi meneper aliba mapang Tuli Lenten telongtet nung aliba Arogo san kibongtem, lendong atalokba anogo (i.e. 19 July 2026) nungi tenzüka Tuli Administration aser Tuli Town Council-i anir telok balalai timtemer kibongtem anepalua yariba atema Arogoi kanga pelaba metetdaksür. Iba den külemi Arogotem aser Telok balalai rongsen tulu bener tsüngtong arua sarasadem agi yaritepbatem tenüng metetshibo tepela lemsaba tzüra matem nung iba osangkaket ajanga nenok ajak dang tenüng tetshia kanga pelaba lemsateper.

Teyari agütsürtem:

- | | |
|--|---|
| 1. ABAM nungi | : Rs. 2,31,500/- |
| 2. Merangkong B/A | : Rs. 20,000/- |
| 3. Luyong B/A | : Rs. 10,000/- |
| 4. Molungyimsen B/A | : Rs. 10,000/- |
| 5. Yaongyimsen B/A | : Rs. 10,000/- |
| 6. Changtongya B/A | : Rs. 15,000/- |
| 7. Chungtia B/A | : Rs. 25,000/- |
| 8. MTBA | : Rs. 50,000/- |
| 9. Langpangkong Sannüker Telongjem | : Rs. 5,000/- |
| 10. Ongpangkong Arogo Tenzüker Telongjem | : Rs. 4000/- |
| 11. "Vision 2020 ASIA" Nagaland | : 95 set of Bed spread with two pillow case each. |

Nenok mapa tajung tajungsang Tsüngremi nguogo. Tagizüker dang nungibo tagütsür tali temoatsüba süangma ta TLBA-i sarasadema pelaba osang lemsateper.

Arogo tenüng nung, Rev. C. Tongpang Pastor, TLBA

Russia-i Ukraine tesem balala nung nisung aika tepset

Kyiv, Luroi/August 9 (Agencies): Russia-i Honibar aonung nungi Deobar anepbong tashi Ukraine northeast tsütsü Kharkiv yimti nung nisung aliba apartment building ka nung amakdang nisung ana tepset aser Moscow-i Ukraine energy infrastructure nung amakba tali kumogo.

Russia sepaitemi Saltivskyi district nung anüngleni atongtepa tua aliba ki ka amakba nung arishi küm 50 tain ka aser arishi küm 66 tain tebur ana tepset, ta Kharkiv Governor Oleh Syniehubov-i Telegram nung zülü. Yangji nisung 21 yiru.

Syniehubov-i iba tesem nung tangokba noksa ka lemsatepba nung storey pezü ki ka nung tapok tuluka nungi mokozü adoka aliba nguogo.

Linük south tsütsü Kherson region nung Russian artillery ajanga Deobarnep Berislavsky district nung arishi küm 61 tain tetsür ka tepset, ta iba region indang prosecutor office ajanga ashi.

Dnipropetrovsk region nung aliba Pavlohrad yimti nunga shopping mall ka anasa amakba nung nisung toku yiru, ta Ukraine Tir Volodymyr Zelenskyy-i X nung zülutsü. Yirur rongnung tanur pezü dena lir.

Zhytomyr, Mykolaiv, Kyiv, Kherson, Sumy, Kharkiv, Dnipro, Zaporizhia aser Donetsk region tem nunga amak, ta Zelenskyy-i ashi.

Russia nung TASS news

agency ajanga ashiba agi, Honibar aonung Ukraine nunger drone kati Belgorod nung amakba nung civilian asem tepset.

Moscow-i ano Odesa nunga amak, kong mapang shia amaker. Russian sepaitemi yasüng ballistic, antiship aser anti-radar missiles tem aser Shahed drones 200 dak tema khaloktsü, ta Ukraine indang air force ajanga Telegram nung ashi.

Tesem 22 nung missiles aser drone amshia amakba liasü aser tesem trok nung missiles khazüka yokba liasü.

Russia indang TASS news agency ajangasa Odesa rongnendak totzü, lubricants aser mitkar indang osettsüset yua aliba tesem nung amakba ashi.

Odesa nung energy sector amak aser power akhi ama agütsütsü asoshi yanglushiba mapa tenzükogo, ta Zelenskyy-isa ashi. Nisung ti yiru aser nisung aliba ki aser rongnendak tesemtem raksa.

"Ibai Russia-i talisa global food security anema warabaji alitsü," ta Ukraine leniri Odesa rongnendak nungi alima tesem balalai jang o tzü belenshiba athishia ashi.

July ita mezüng hopta asem tsüngta iba rongnendak amakba nung nisung 28 tepsetogo, ta Governor Oleh Kiper-i taoba mapang shia liasü.

Russia-i ano northeast tsütsü Sumy region nung oil refineries ana nung amak, ta osang ajanga ashir.

Chaliha-i Korea Masters nung mezüngbuba BWF World Tour Title benogo



Luroi/August 9, 2026

(Agencies): India tsür Ashmita Chaliha-i Deobarnü Korea Masters Super 300 badminton tournament tetsür kija asaya final nung fourth seed China tsür Han Qian Xi koka la indang career nung tang mezüngbuba BWF World tour title ka benogo.

Arishi küm 26 tain Assam nungi asayar yagi asaya meyilongi tenzük saka mezüngbuba game makokba sülen tanungba game ana koka world No. 35 Han 14-21, 21-14, 21-14 agi kokogo.

Tanvi Sharma-i taoba Deobarnü Taipei Open akokba sülen Ashmita-i tang iba asayamung akokba tetezü India tsür anati BWF World Tour ana atonga kokogo.

Mezüngbuba game nung India tsür la ya 3-0 agi tejakdang sür tenzük saka Han-i yakta dang la menepa 9-5 aküm aser break tashi nung 11-11 liasü.

Ajisüaka iba sülen China tsür la yagi tajungba asayateta Chaliha nem point asem dang ngudaktsür asaya 21-14 agi akok.

Tanabuba game nung Ashmita-ia telanzüba tajung agüja asaya saka tenaprongla katia ka mamokbangteti asaya-a point menetpeta dang nguyonga atu, saka break tashi nung India tsür la ya 11-8 agi tejakdang liasü.

Iba sülen Han-i Ashmita den toktepa masayateti aküm aser point 17-10 akümba sülen mapang tatsüka dang lir Ashmita-i asaya 21-14 agi akok.

Tatembuba game ya tetenzüklenbo asayar ana kanga toktepba aser break tashi nung Han 11-9 agi tejakdang liasü.

Ajisüaka Ashmita-i metoktsüi kanga meranga asaya aser la 12-11 agi tejakdang aküm. India tsür la yagi maneni gap ngua kanga junga asaya aser la 19-14 agi tejakdang akümba sülen maneni point ana atonga ngua asaya koka liasü.

La taküm asayamung ka ana nungbo junga asayaago, saka yiruba ajanga ita asem masayateti liasü. La China Masters aser Malaysia Masters nung quarterfinal tonga asaya aser Macau Open nunga semifinal tonga asayar liasü.

World number 50 asayar ya Guwahati nung National Centre of excellence nung Park Tae-Sang kübok training agidar.

World U20 C'ships: Shahnava-i Long Jump nung bronze medal angu



Luroi/August 9, 2026

(Agencies): Eugene, USA nung tang asaya aliba World U20 Championships nung India nung arishi küm 18 tain long jump asayar Shahnava Khan-i Deobarnü bronze medal ka nguogo. Pai 7.84m jukteta liasü.

Arishi küm 18 tain asayar yagi tasembenbuba merangdangba mapang tajungtiba jukteta liasü. Pa ponguben ajokba mapang 7.67m, 7.72m, 7.84m, 7.52m, 7.83m aser 5.37m jukteta liasü.

Iba asaya nung India nung RC Jithin Arjunan-a final-i ai saka pai 7.59m dang jukteta tibuba nung tembanga liasü.

Iba asaya ya Italy nung asayar Daniele Inzoli-i 7.97m jukteta akok, aser Australia nung asayar Mason McGroder-i (7.96m) silver medal angu.

Kasa asayamung nung Basant Kumar Meghwal-i tebur high jump asaya nung silver medal nguogo.

Anupgarh nungi arishi küm 19 tain asayar yagi 2.21m jukteta silver medal angu, koba pa indang career nung tang tashi nung tajungtiba jukteta lir.

Tebur high jump asaya nung Algeria nung asayar Younes Ayachi-i gold medal aser Great Britain nung asayar Otis Poole-i bronze medal ngua liasü.

Iba asayamung nung India atema mezüngbuba medal Ashish Yadav-i Hokolbarnü tebur javelin throw asaya nung ngua liasü. Pai silver medal angu.

Yadav ya Neeraj Chopra sülen India nung asayartem rongnungi World U20 Championships nung javelin asaya nung silver medal anguba tanabuba asayar kümogo.

Iba asaya nung takok tajung anguba sülen Chopra-i Yadav nem tenüngsang agütsü aser ashiba agi iba ya tetenzükler dang lir.

Man City-i Marseille keeper Rulli alizüktsü atema mulunga agizükogo

Luroi/August 9, 2026

(Agencies): Manchester City-i, Marseille nungi Argentina nung goalkeeper Geronimo Rullipound million 1.7 agi alizüktsü mulunga agizükogo.

Arishi küm 34 tain asayar ya Etihad Stadium-i meyipa arutsü, kong pa 2016-17 season nunga asayaago, saka first-team nungi khen danga masayai liasü. Tang pai club den küm ana atema tenanzüktepba yangluogo.

Rulli-i 2021 küm Villarreal puri Europa League final nung Manchester United akokba mapang kanga dang tongtibang penalty ka idakja par team-i takok dangi ania liasü. Final nung team ana penalty aika metsütepba sülen Rulli-isa, David de Gea-i metsüba ball nokdangtetba ajanga parnoki asaya koka liasü.

Pa Argentina team nungi tiben asayaago aser pa 2022 World Cup aser 2024 Copa America akokba team nung züngoksema liasü.

Maneni Rulli ya Europe nung club balala nung asaya senzüogo, kong Real Sociedad, Montpellier aser Ajax nung densema lir.

Pa ya England goalkeeper James Trafford melena City nung denogo, shiba iba hopta tetenzüklen City toktsür pound



million 45 yong Leeds nung denogo. Rulli ya number one Gianluigi Donnarumma temelener ama asayatsü imlar.

Kasa mapang nung Manchester City-i, midfielder Rodri atema Barcelona puri pound million 38.5 agütsü benokdangba magizük.

Rodri ayoktsü atema City-i mulunga lir, saka pa atema pound million 60 dak tema meshitsü. Arishi küm 30 tain asayar ya Etihad Stadium nung

tenanzüktepba yanglur aliba tatembangbuba küm lir aser pai club den tenanzüktepba meyanglushi-i lir.

Pa Real Madrid-i aotsü ama bilema liasü, saka Barcelona puria pa alizüktsü atema merangdangdar aser source temi BBC Sport dang ashiba agi, pa Branca-ang aotsü akok. Asayar yagi City den sensak asemstsü atema Barca nem temelaba agütsüogo, ta source yagisa shisem.

Canadian Open: Sabalenka aser Norrie na tsükogo

Luroi/August 9, 2026

(Agencies): Tetsür tennis asayartem rongnung world number one Aryna Sabalenka Canadian Open nung mimlai tsükogo aser Britain nung asayar Cameron Norrie-a round of 16 nung tsükogo.

Sabalenka-i 7-6 (7-3) 4-6 6-4 agi Russia tsür Ekaterina Alexandrova mekoki liasü. Toronto nung tena ghonda ana ser tesadang asaya liasü.

Belarus tsür la yagi mezüngbuba set makok saka tanabuba set koka decider asayatsüsa aküm, ajisüaka kanga dang tongtibang mapang ka nung double fault menaba sülen tsükogo.

Sabalenka asayamung ishika junga masayateti arudar aser la French Open nung quarter-finals aser Wimbledon nung round of 16 nung tsüka liasü.

Russia tsür la ya quarter final nung Ukraine tsür Elina Svitolina den asayatsü, shibai America tsür eighth seed Amanda Anisimova 6-2 6-4 agi kokogo.

Third seed Jessica Pegula-a

arishi küm 22 tain Diana Shnaider-i 6-3 6-3 agi tsükdaktsüogo.

Russia tsür la ya semi-finals nung Iga Swiatek den asayatsü. Swiatek-i 10th seed Marta Kostyuk 3-6 6-1 6-2 agi kokogo.

Grand Slam trok koker alila ya mezüngbuba set asayaba sülen temang anepalutsü atema locker room-i ai aser iba sülen meyipa adoker kanga junga asaya liasü.

Kasa mapang nung Montreal nung tebur asaya nung British nung number two asayar Cameron Norrie 6-2 7-6 (10-8) agi 18 seed Arthur Fils-i tsükdaktsüogo.

Fils ya quarter-finals nung Spain nung asayar Rafael Jodar den asayatsü. Arishi küm 19 tain Jodar-i 6-3 6-3 agi eighth seed Jiri Lehecka koka liasü.

Brandon Nakashima aser Luciano Darderi natia Arthur Rinderknech aser Nuno Borges na akokba sülen taruba round-i iogo.

Italy nung asayar Darderi-i 4-6 6-3 7-5 agi Borges madak takok ngua liasü.

BILEMDANGANG

"Inyakdangiang mapa ka tasak temela jangjar."